



NACRT

Na osnovu člana 20. stav (3) Zakona o vodama SBK/KSB („Službene novine SBK/KSB“, broj: 11/09), člana 59. stav (1) Zakona o komunalnim djelatnostima („Službene novine SBK/KSB“, broj: 13/13), člana 8. Zakona o principima lokalne samouprave („Službene novine Federacije BiH“, broj 49/06) i člana 34. Statuta Općine Travnik (prečišćeni tekst: „Službene novine Općine Travnik“, broj: 11/05), Općinsko vijeće Travnik na sjednici održanoj dana _____ 2019.godine, **d o n o s i**

ODLUKU

o odvodnji otpadnih voda na području Općine Travnik

Član 1.

(Predmet odluke)

Ovom Odlukom uređuje se obavljanje komunalne djelatnosti odvodnje i prečišćavanja otpadnih voda na području općine Travnik, a naročito:

- a) vrste otpadnih voda,
- b) sistemi odvodnje otpadnih voda,
- c) sistem unutarnje odvodnje otpadnih voda,
- d) nosilac usluge odvodnje i prečišćavanja otpadnih voda na području općine,
- e) korisnici usluge odvodnje i prečišćavanja otpadnih voda na području općine,
- f) uslovi i način obavljanja komunalne djelatnosti odvodnje i prečišćavanja otpadnih voda,
- g) uslovi i način ispuštanja otpadnih voda na područjima na kojima nije izgrađen sistem javne odvodnje otpadnih voda,
- h) izgradnja kanalizacijske mreže i drugih objekata i uređaja sistema odvodnje i prečišćavanja otpadnih voda,
- i) upravljanje, korištenje, održavanje i mjere zaštite objekata i uređaja sistema odvodnje i prečišćavanja otpadnih voda,
- j) uslovi i način pružanja usluge odvodnje i prečišćavanja otpadnih voda korisniku usluge,
- k) uslovi i način priključenja korisnika usluge na objekte i uređaje sistema odvodnje i prečišćavanja otpadnih voda,
- l) uskraćivanje usluge odvodnje i prečišćavanja otpadnih voda,
- m) međusobni odnosi davaoca i korisnika usluge odvodnje i prečišćavanja otpadnih voda,
- n) način obračuna i plaćanja naknade za pruženu uslugu odvodnje i prečišćavanja otpadnih voda,
- o) nadzor nad provođenjem odredaba Odluke,
- p) kaznene odredbe za nepoštivanje odredaba Odluke.

Član 2.

(Vrste otpadnih voda)

- (1) Otpadnim vodama, u smislu ove Odluke, smatraju se vode koje su promijenile svoje prirodne, fizičke, hemijske ili biološke osobine rezultatom ljudskih aktivnosti.
- (2) Otpadne vode iz stava (1) ovog člana dijele se na:
 - a) sanitarne otpadne vode (vode iz domaćinstava, ugostiteljstva, zdravstva, školstva, uslužnih i drugih neproizvodnih djelatnosti),
 - b) industrijske vode (nastale kao posljedica tehnološkog procesa u industriji, privredi, zanatstvu i drugim djelatnostima),
 - c) rashladne otpadne vode (koje nisu nastale kao posljedica tehnološkog procesa),
 - d) radioaktivne otpadne vode (koje sadrže radioaktivne tvari i otpad),
 - e) oborinske vode kao posljedica kiše, grada, topljenja snijega i sl.,
 - f) vode od pranja ulica,
 - g) drenažne vode.

Član 3.

(Sistemi odvodnje otpadnih voda)

- (1) Sistem javne odvodnje otpadnih voda sačinjavaju objekti i uređaji koji služe za prikupljanje, prečišćavanje i ispuštanje u recipijent voda iz sistema unutarnje odvodnje otpadnih voda.
 - a) Sistem javne odvodnje otpadnih voda može biti:
 - b) mješoviti sistem,
 - c) odvojeni sistem,
 - d) kombinovani sistem.
- (2) Mješovitim sistemom javne odvodnje odvođe se zajedno sve otpadne vode iz člana 2. stav (2) ove Odluke.
- (3) Odvojenim sistemom javne odvodnje odvođe se otpadne vode iz člana 2. stav (2) tačka a), b), c) i d) ove Odluke.
- (4) Kod kombinovanog sistema javne odvodnje otpadnih voda dio područja obuhvaćenog odvodnjom pokriven je mješovitim sistemom, a dio odvojenim sistemom.
- (5) Posebnim odvojenim sistemom javne odvodnje odvođe se otpadne vode iz člana 2. stav (2) tačka e), f) i g) ove Odluke.
- (6) Odredbama ove Odluke uređuje se odvodnja otpadnih voda sistemima javne odvodnje iz stava (3) i stava (4) ovog člana.

Član 4.

(Sistem unutarnje odvodnje otpadnih voda)

- (1) Sistem unutarnje odvodnje otpadnih voda čine instalacije, objekti i uređaji za skupljanje i prečišćavanje otpadnih voda, ukoliko je prečišćavanje potrebno, te njihovo odvođenje do kontrolnog okna, odnosno do spoja sa sistemom javne odvodnje, uključujući i kontrolno okno.
- (2) Sistem unutarnje odvodnje otpadnih voda je u vlasništvu vlasnika građevine koja je priključena na javni sistem odvodnje otpadnih voda.

Član 5.

(Nosilac usluge odvodnje i prečišćavanja otpadnih voda)

Komunalnu djelatnost odvodnje i prečišćavanja otpadnih voda na području općine Travnik obavljaju javna komunalna preduzeća koja je osnovala općina Travnik i povjerila im obavljanje ove djelatnosti u skladu sa odredbama Zakona o komunalnim djelatnostima (u daljnjem tekstu: davalac usluge).

Na području sportsko-rekreacionog centra Babanovac na Vlašiću upravljanje i održavanje javne kanalizacije vrši preduzeće koje je ovlašteno za pružanje komunalnih usluga.

Član 6.

(Korisnik usluge odvodnje i prečišćavanja otpadnih voda)

- (1) Korisnikom komunalne usluge odvodnje i prečišćavanja otpadnih voda smatra se svako fizičko ili pravno lice, vlasnik građevine koja je priključena na sistem javne odvodnje otpadnih voda i koji je sa davaocem usluge zaključio ugovor o međusobnim pravima i obavezama u pružanju, odnosno korištenju usluge odvodnje i prečišćavanja otpadnih voda.
- (2) Korisnikom usluge odvodnje i prečišćavanja otpadnih voda smatra se i fizičko ili pravno lice, vlasnik uređenih (nepropusnih) saobraćajnih i drugih površina sa kojih se oborinske vode i vode od pranja tih površina odvođe u sistem javne odvodnje otpadnih voda.
- (3) Korisnikom usluge smatra se i vlasnik drenažnog sistema iz kojeg se drenažne vode odvođe u sistem javne odvodnje otpadnih voda.
- (4) Korisnikom usluge smatra se i vlasnik građevine iz koje se otpadne vode ispuštaju u popisno izgrađenu sabirnu (septičku) jamu i koji ima zaključen ugovor sa davaocem usluge.

II USLOVI I NAČIN OBAVLJANJA KOMUNALNE DJELATNOSTI ODVODNJE I PREČIŠĆAVANJA OTPADNIH VODA

Član 7.

(Sistemi javne odvodnje otpadnih voda)

- (1) Otpadne vode Općine Travnik odvođe se sistemom javne odvodnje otpadnih voda.
- (2) U sklopu sistema javne odvodnje otpadnih voda iz stava (1) ovog člana ne postoji izgrađen uređaj za prečišćavanje otpadnih voda.
- (3) Do izgradnje uređaja za prečišćavanje otpadnih voda iz stava (1) ovog člana, otpadne vode se ispuštaju direktno u prirodne vodotoke.
- (4) Na područjima općine na kojima nije izgrađen sistem javne odvodnje otpadnih voda otpadne vode se ispuštaju u nepropusne sabirne (septičke) jame ili u lokalni sistem odvodnje otpadnih voda, na način propisan odredbama ove Odluke.
- (5) Na područjima općine na kojima postoji izgrađen odgovarajući sistem odvodnje otpadnih voda nije dozvoljena izgradnja sabirnih (septičkih) jama.

Član 8.

(Ispuštanje otpadnih voda u sistem javne odvodnje otpadnih voda)

- (1) Otpadne vode ispuštaju se u sistem javne odvodnje otpadnih voda u skladu sa odredbama člana 3. ove Odluke.
- (2) Kod odvojenih sistema odvodnje otpadnih voda jednim sistemom se odvođe otpadne vode iz člana 2. stav (2) tačka a) do d) ove Odluke, dok se posebnim sistemom odvodnje odvođe otpadne vode iz člana 2. stav (2) tačka e), f) i g) ove Odluke.
- (3) U mješoviti sistem javne odvodnje otpadnih voda, odvođe se zajedno sve otpadne vode iz člana 2. stav (2) ove Odluke, s tim da otpadne vode iz člana 2. stav (2) tačka e), f) i g) u sistem mogu se ispuštati samo sa uređenih, nepropusnih površina, odnosno drenažnih sistema.

Član 9.

(Kvalitet otpadne vode koja se ispušta u sistem javne odvodnje otpadnih voda)

Korisnik usluge odvodnje otpadnih voda putem sistema javne odvodnje otpadnih voda dužan je otpadne vode koje ispušta u sistem javne odvodnje otpadnih voda svesti na kvalitetu vode utvrđenu prema važećim propisima, uslovima iz vodnog akta i aktima davaoca usluge, odnosno do određenog standarda sanitarnih otpadnih voda, koji neće ugroziti pravilan rad sistema javne odvodnje i prečišćavanje otpadnih voda, niti će imati uticaja na kvalitet okoliša u cjelini.

Član 10.

(Obaveza prethodnog prečišćavanja otpadnih voda)

- (1) Industrijske tehnološke i druge otpadne vode koje su agresivne, toksične ili su zagađene patogenim klicama, virusima i radioaktivne, mogu se ispuštati u sistem javne odvodnje otpadnih voda samo ako su prethodno prečišćene i neutralizirane putem posebnih uređaja za prečišćavanje, do stepena propisanog važećim propisima.
- (2) Svaki korisnik usluge koji u sistem javne odvodnje otpadnih voda ispušta otpadne vode iz stava (1) ovog člana, mora posjedovati odgovarajući vodni akt izdan od strane organa uprave nadležnog za poslove voda u skladu sa odredbama federalnog i kantonalnog Zakona o vodama.
- (3) Uređaji za prethodno prečišćavanje otpadnih voda moraju biti izvedeni tako da je obezbijeđeno neprekidno prečišćavanje otpadnih voda i kada se instalacije i uređaji sistema unutarne odvodnje otpadnih voda čiste ili popravljaju.
- (4) Građevine koje ispuštaju otpadne vode iz stava (1) ovog člana ne mogu biti priključene na sistem javne odvodnje otpadnih voda, ukoliko nemaju izgrađen uređaj za prethodno prečišćavanje otpadnih voda i ne posjeduju akt nadležnog organa uprave iz stava (2) ovog člana.

Član 11.

(Analiza kvaliteta otpadnih voda)

- (1) Davalac usluge je dužan analizirati kvalitet otpadnih voda iz člana 9. ove Odluke.
- (2) Prilikom vršenja analize kvaliteta otpadnih voda davalac usluge je dužan primjenjivati odredbe Uredbe o uslovima ispuštanja otpadnih voda u u okoliš i sisteme javne kanalizacije („Službene novine Federacije BiH“, broj: 101/15 i 1/16).
- (3) Troškove analize snosi davalac usluge.

Član 12.

(Tvari koje se ne smiju ispuštati u sistem javne odvodnje otpadnih voda)

- (1) U sistem javne odvodnje otpadnih voda ne smiju se ispuštati, naročito:
 - a) krute i viskozne tvari, koje same ili u kontaktu sa drugim tvarima mogu prouzročiti smetnje u protoku vode kroz cijevi ili druge smetnje u radu sistema otpadnih voda kao što su: pepeo, gips, pijesak, šljaka, slama, otpaci i strugotine metala, plastike i drveta, krpe, perje, dlake, uginule životinje, mesni ostaci, krečni mulj i ostatak kreča, otpad iz proizvodnje piva, konzervi i destilacija, ostaci hemikalija, boja i sl.,
 - b) masti i ulja,
 - c) sirutka,
 - d) talozi koji nastaju pri pročišćavanju voda, cementni mulj, ostaci betona, tvari koje nastaju čišćenjem stambenih, poslovnih i proizvodnih pogona, kruti otpaci hrane, plivajuće tvari i dr.,
 - e) kisele, alkalne, agresivne i ostale štetne tvari koje nepovoljno djeluju na materijal od kojega su izgrađeni objekti i uređaji sistema odvodnje otpadnih voda,
 - f) tvari koje same ili u kontaktu sa drugim tvarima mogu izazvati smetnje i opasnost po zdravlje ili život ljudi ili spriječiti ulaz u kanale, objekte i uređaje radi održavanja i popravaka, kao što su: zapaljive i eksplozivne tekućine, štetni plinovi neugodnog mirisa (sumpor vodik, sumporni dioksid, dušikovi oksidi, cijanidi, klor i drugi),
 - g) patogene bakterije ili virusi,
 - h) radioaktivne materije,
 - i) ostale štetne tvari.
- (2) Tvari iz stava (1) ovog člana, kao i druge opasne i štetne tvari, korisnik usluge odvodnje otpadnih voda dužan je posebno odlagati i odstranjivati u skladu sa odredbama posebnih propisa.

Član 13.

(Obaveza davanja usluge)

- (1) Davalac usluge je dužan da, bez prekida, obezbijedi efikasno funkcionisanje sistema javne odvodnje otpadnih voda.
- (2) Davalac usluge je odgovoran za punu i pravilnu primjenu propisa i tehničkih mjera koje se odnose na obavljanje djelatnosti odvodnje i prečišćavanja otpadnih voda.

Član 14.

(Prekidi u funkcionisanju sistema odvodnje otpadnih voda)

- (1) U slučaju planiranog prekida u funkcionisanju sistema odvodnje otpadnih voda davalac usluge je dužan o tome obavijestiti korisnike usluge najmanje jedan dan ranije putem sredstava javnog informisanja i pisanim obavijestima (plakatima) koji se postavljaju na više lokacija na području na kojem se planira prekid u funkcionisanju sistema odvodnje otpadnih voda, a veće korisnike usluge i pismeno ili putem telefona.
- (2) Po otklanjanju razloga prekida u funkcionisanju sistema odvodnje otpadnih voda davalac usluge je dužan da odmah obavijesti korisnike usluge o funkcionisanju sistema, na isti način kao u stavu (1) ovog člana.

Član 15.

(Neplanirani prekid u funkcionisanju sistema odvodnje otpadnih voda)

- (1) U slučaju nastupanja neplaniranih prekida ili poremećaja u funkcionisanju sistema odvodnje otpadnih voda, davalac usluge je dužan da odmah poduzme sve potrebne mjere kako bi se u što kraćem roku normaliziralo stanje u odvodnji otpadnih voda, odnosno funkcionisanju sistema odvodnje otpadnih voda.
- (2) U slučaju iz stava (1) ovog člana davalac usluge je dužan da odmah obavijesti korisnike usluge, putem elektronskih sredstava javnog informisanja ili na neki drugi pogodan način.

Član 16.

(Odgovornost za štetu nastalu uslijed prekida u funkcionisanju sistema odvodnje otpadnih voda)

- (1) Davalac usluge nije odgovoran za štetu nastalu uslijed više sile (neuobičajeno visok nivo recipijenta, velike oborine, zemljotres i dr.), kao i većih tehničkih smetnji izazvanih bez krivnje davaoca usluge.
- (2) Davalac usluge je odgovoran za štetu nastalu uslijed neodržavanja ili nedovoljnog održavanja objekata i uređaja sistema odvodnje otpadnih voda.

Član 17.

(Primjena propisa na obavljanje djelatnosti odvodnje i prečišćavanja otpadnih voda)

Na obavljanje komunalne djelatnosti odvodnje i prečišćavanja otpadnih voda primjenjuju se odredbe federalnog i kantonalnog Zakona o vodama, kantonalnog Zakona o komunalnim djelatnostima i pod zakonskih propisa donesenih na osnovu tih zakonskih propisa, kao i odredbe ove Odluke.

III USLOVI I NAČIN ISPUŠTANJA OTPADNIH VODA NA PODRUČJIMA NA KOJIMA NIJE IZGRAĐEN SISTEM JAVNE ODVODNJE OTPADNIH VODA

Član 18.

(Odvodnja otpadnih voda na područjima na kojima nije izgrađen sistem javne odvodnje otpadnih voda)

- (1) Na područjima na kojima nije izgrađen sistem javne odvodnje otpadnih voda, otpadna voda iz sistema unutarne odvodnje otpadnih voda ispušta se u sabirne jame (za više objekata) ili septičke jame (za pojedinačne objekte).
- (2) Izuzetno od odredaba stava (1) ovog člana na područjima iz stava (1) ovog člana otpadne vode iz sistema unutarne odvodnje otpadnih voda ispuštaju se u lokalni sistem odvodnje otpadnih voda, na način propisan odredbama ove Odluke.
- (3) Na područjima na kojima postoji izgrađen sistem javne odvodnje otpadnih voda i lokalni sistem odvodnje otpadnih voda nije dozvoljeno graditi sabirne (septičke) jame i koristiti se njima.

Član 19.

(Način izgradnje sabirnih jama)

- (1) Septičke jame i sabirne jame moraju biti izgrađene sa nepropusnim zidovima i dnom, i moraju imati zaobljene prelaze između zidova i dna radi lakšeg pražnjenja, te bez ispusta i preljeva.
- (2) Septičke i sabirne jame, sa gornje strane moraju biti prekrivene armiranobetonskom pločom debljine $d = 15$ cm, a nad pločom slojem zemlje debljine 0,5 m zbog zaštite od utjecaja vanjske temperature.
- (3) Septičke i sabirne jame izgrađuju se tako da svaka komora ima otvor za čišćenje minimalne veličine 60 x 60 cm i mora biti zatvoren betonskim ili željeznim poklopcem. Otvor mora biti vidljiv, tj. ne smije biti prekriven zemljom ili drugim materijalom.
- (4) Septičke i sabirne jame moraju imati ugrađen ventilacioni otvor sa svrhom odvodnje plinova (ugljični dioksid, dušik, metan i sumporovodik) koji se razvijaju uslijed procesa truljenja i otklanjanja opasnosti po ljude pri održavanju jama.

- (5) Sabirne (septičke) jame moraju se nalaziti na mjestu do kojeg je u svako vrijeme moguć pristup posebnim vozilima za pražnjenje sadržaja sabirne (septičke) jame.

Član 20.

(Izgradnja sabirnih jama prilikom izgradnje poslovnih i drugih građevina)

Prilikom izgradnje poslovnih, proizvodnih, ugostiteljskih, zdravstvenih, turističkih i drugih objekata na područjima na kojima ne postoji izgrađen sistem javne odvodnje otpadnih voda i lokalni sistem odvodnje otpadnih voda, izgradnja sabirne (septičke) jame dozvoljena je samo uz prethodno pribavljen vodni akt od strane organa uprave nadležnog za vode, u skladu sa odredbama federalnog i kantonalnog Zakona o vodama i odredbama ove Odluke.

Član 21.

(Kvaliteta otpadne vode koja se upušta u sabirne jame)

- (1) Korisnik, odnosno vlasnik sabirne (septičke) jame dužan je otpadne vode koje upušta u sabirnu jamu svesti na kvalitetu vode utvrđenu prema važećim propisima, vodnim uslovima i aktima davaoca usluge, odnosno do određenog standarda otpadnih voda koji neće imati negativan uticaj na kvalitetu okoliša i život i zdravlje ljudi.
- (2) U septičke i sabirne jame direktno se mogu ispuštati samo sanitarne zagađene vode (vode iz domaćinstva i sl.).
- (3) Industrijske zagađene vode koje su nastale kao posljedica tehnološkog procesa i druge otpadne vode koje su agresivne, toksične ili su zagađene patogenim klicama, virusima i radioaktivne, mogu se upuštati u sabirne (septičke) jame samo ako su prethodno prečišćene i neutralizirane putem posebnih uređaja za prečišćavanje, do stepena propisanog važećim propisima.
- (4) Oborinske i površinske vode, te vode koje nisu nastale kao posljedica tehnološkog procesa (rashladne otpadne vode, vode od pranja ulica i drenažne vode) ne smiju se ispuštati u septičke i sabirne jame.

Član 22.

(Pražnjenje sabirnih jama)

- (1) Pražnjenje i čišćenje sabirnih (septičkih) jama vrši se zavisno od veličine jame, a najmanje jednom godišnje.
- (2) Pražnjenje sabirnih (septičkih) jama na području općine vrši davalac usluge.
- (3) Davalac usluge koje upravlja javnom kanalizacijom prazni i čisti sabirne i septičke jame i odvozi njihov sadržaj isključivo specijalnim vozilima, koja se nakon dnevne upotrebe moraju oprati i dezinfikovati.
- (4) Davalac usluge dužan je sadržaj sabirnih i septičkih jama izljevati u javnu kanalizaciju na mjestima koja odredi kantonalni/općinski organ uprave nadležan za poslove sanitarne inspekcije.
- (5) Mjesta iz prethodnog stava moraju se svaki put nakon izlivanja felikalija očistiti (oprati sa vodom pod pritiskom) i propisno dezinfikovati.
- (6) Pražnjenje posebnih vozila davalac usluge vrši na određeno mjesto sistema javne odvodnje otpadnih voda, odnosno na postrojenju za prečišćavanje otpadnih voda kada isto bude izgrađeno i u funkciji.
- (7) Odnosi između korisnika usluge – vlasnika, odnosno korisnika sabirne (septičke) jame i davatelja usluge vezano za pražnjenje, održavanje (čišćenje) sabirne jame uređuju se u skladu sa odredbama člana 14. Zakona o komunalnim djelatnostima („Sl. novine SBK/KSB“, broj: 13/13).

Član 23.

(Obaveza priključenja na sistem javne odvodnje otpadnih voda)

- (1) Nakon izgradnje sistema javne odvodnje otpadnih voda, vlasnik odnosno korisnik sabirne (septičke) jame dužan je izgraditi priključak prema uslovima koje odredi davalac usluge i priključiti se na sistem javne odvodnje otpadnih voda u roku od tri mjeseca od završetka izgradnje tog sistema.
- (2) Nakon priključenja unutarnjeg sistema otpadnih voda na sistem javne odvodnje otpadnih voda ili na lokalni sistem odvodnje otpadnih voda, vlasnik odnosno korisnik sabirne

(septičke) jame dužan je sve dosadašnje instalacije i uređaje, uključujući i sabirnu (septičku) jamu, koji se više neće koristiti, očistiti i odstraniti ili sanirati.

Član 24.

(Evidencija sabirnih – septičkih jama)

- (1) Davalac usluge je dužan voditi evidenciju vlasnika, odnosno korisnika sabirnih jama i septičkih jama i evidenciju pražnjenja istih.
- (2) Davalac usluge je dužan izraditi program pražnjenja i čišćenja sabirnih (septičkih) jama, vodeći računa o broju sabirnih (septičkih) jama, njihovoj veličini i udaljenosti istih od mjesta ispuštanja sadržaja sabirnih (septičkih) jama u sistem javne odvodnje otpadnih voda.
- (3) O danu određenom za pražnjenje sabirnih i septičkih jama i odvozu njihovog sadržaja moraju se obavijestiti njihovi vlasnici, odnosno korisnici.
- (4) Davalac usluge je dužan prijaviti komunalnoj inspekciji svakog korisnika sabirne i septičke jame, ako iste ne održava u ispravnom stanju.

Član 25.

(Lokalni sistemi odvodnje otpadnih voda)

- (1) Lokalni sistemi odvodnje otpadnih voda iz člana 18. stav (2) ove Odluke izgrađuju se u skladu sa odredbama ove Odluke koje se odnose na izgradnju sistema javne odvodnje otpadnih voda.
- (2) Vlasnik, odnosno korisnik lokalnog sistema odvodnje otpadnih voda dužan je lokalni sistem odvodnje otpadnih voda održavati u ispravnom, odnosno funkcionalnom stanju, do predaje sistema na upravljanje i održavanje davaocu usluge.

Član 26.

(Ispuštanje otpadnih voda na javne površine i zemljišta)

- (1) Zabranjeno je ispuštanje otpadnih voda iz poslovnih prostora, domaćinstava, privrednih objekata, gnojišta, septičkih i sabirnih jama na javne površine (ceste, puteve, odvodne jarke, zelene površine) na zemljište u vlasništvu druge osobe, te na vlastito zemljište.
- (2) Domaćinstva koja drže krupnu i sitnu stoku moraju imati ograđena gnojišta sa odgovarajućom osočnom jamom za prikupljanje otpadnih voda i osoke (gnojnice), izgrađene od betona ili drugog tvrdog nepropusnog materijala.

IV IZGRADNJA OBJEKATA I UREĐAJA SISTEMA ODVODNJE I PREČIŠĆAVANJA OTPADNIH VODA

Član 27.

(Izgradnja objekata i uređaja sistema odvodnje i prečišćavanja otpadnih voda)

- (1) Izgradnja nove i rekonstrukcija postojeće kanalizacione mreže i drugih objekata i uređaja sistema odvodnje i prečišćavanja otpadnih voda vrši se u skladu sa zakonskim propisima iz oblasti prostornog uređenja i građenja, voda, zaštite okoliša i komunalnih djelatnosti i pod zakonskim propisima donesenim na osnovu tih zakonskih propisa.
- (2) Osnov za planiranje izgradnje i izradu investiciono – tehničke dokumentacije za izgradnju objekata i uređaja sistema odvodnje i prečišćavanje otpadnih voda su planski dokumenti iz oblasti prostornog uređenja (prostorni plan općine, urbanistički plan, regulacioni plan, urbanistički projekt, zoning plan).

Član 28.

(Općina kao investitor izgradnje objekata i uređaja sistema javne odvodnje otpadnih voda)

Investitor izgradnje novih objekata i uređaja sistema javne odvodnje i prečišćavanja otpadnih voda na području općine je Općina, ukoliko se ta izgradnja finansira iz sredstava Budžeta općine, odnosno naknada koje se uplaćuju u Budžet općine na osnovu zakonskih propisa iz oblasti prostornog uređenja i građenja i građevinskog zemljišta.

Član 29.

(Davalac usluge kao investitor objekata i uređaja odvodnje otpadnih voda)

Za izgradnju novih i rekonstrukciju postojećih objekata sistema javne odvodnje i prečišćavanje otpadnih voda koji se finansiraju sredstvima davaoca usluge, investitor je sam davalac usluge.

Član 30.

(Investitor lokalnog sistema odvodnje otpadnih voda)

- (1) Investitor objekata i uređaja lokalnog sistema odvodnje otpadnih voda, na područjima na kojima ne postoji izgrađen sistem javne odvodnje i prečišćavanja otpadnih voda, je budući korisnik usluge toga sistema, ukoliko se izgradnja finansira njegovim sredstvima.
- (2) Ukoliko se izgradnja objekata i uređaja lokalnog sistema odvodnje otpadnih voda finansira sredstvima Budžeta općine i sredstvima naknada koja se uplaćuju na Budžet općine, investitor je Općina.

Član 31.

(Investitor izgradnje sabirnih (septičkih) jama)

Investitor izgradnje sabirnih (septičkih) jama na područjima na kojima ne postoji izgrađen sistem javne odvodnje otpadnih voda je vlasnik građevine iz čijeg se unutaršnjeg sistema odvodnje otpadnih voda otpadna voda upušta u sabirnu(septičku) jamu.

Član 32.

(Predaja na upravljanje, korištenje i održavanje izgrađenih objekata i uređaja sistema odvodnje i prečišćavanje otpadnih voda)

- (1) Izgrađenu kanalizacionu mrežu i druge objekte i uređaje sistema odvodnje i prečišćavanja otpadnih voda, investitori iz člana 28. i člana 30. ove Odluke dužni su predati na upravljanje, korištenje i održavanje davaocu usluge, zajedno sa svom investiciono-tehničkom dokumentacijom, odobrenom za građenje i odobrenjem za upotrebu, u roku od šest mjeseci od dana završetka izgradnje, odnosno dobijanja odobrenja za upotrebu.
- (2) Predaja na upravljanje, korištenje i održavanje davaocu usluge kanalizacione mreže i drugih objekata i uređaja lokalnih sistema odvodnje otpadnih voda koji su izgrađeni prije stupanja na snagu ove Odluke izvršiće se u roku od jedne godine od dana stupanja na snagu ove Odluke.

V UPRAVLJANJE, KORIŠTENJE, ODRŽAVANJE I MJERE ZAŠTITE OBJEKATA I UREĐAJA SISTEMA JAVNE ODVODNJE I PREČIŠĆAVANJA OTPADNIH VODA

Član 33.

(Propisi kojih se mora pridržavati davalac usluge)

U upravljanju i korištenju objekata i uređaja sistema javne odvodnje i prečišćavanja otpadnih voda, davalac usluge dužan je pridržavati se odredaba Zakona o komunalnim djelatnostima SBK/KSB i odredaba ove Odluke.

Član 34.

(Obaveza nosioca usluge u održavanju objekata i uređaja sistema javne odvodnje i prečišćavanja otpadnih voda)

Davalac usluge je dužan održavati sistem javne odvodnje i prečišćavanja otpadnih voda, odnosno objekte i uređaje tog sistema, u ispravnom i funkcionalnom stanju koji obezbjeđuje redovnu odvodnju otpadnih voda od sistema unutarnje odvodnje otpadnih voda građevina korisnika usluge do recipijenta otpadnih voda.

Član 35.

(Sredstva za održavanje objekata i uređaja sistema javne odvodnje i prečišćavanja otpadnih voda)

Sredstva za finansiranje obavljanja komunalne djelatnosti odvodnje i prečišćavanja otpadnih voda, uključujući i sredstva za održavanje objekata, uređaja, postrojenja i opreme tog sistema, obezbjeđuje davalac usluge iz sredstava naknade za pružanje odnosno korištenje usluge odvodnje i prečišćavanja otpadnih voda, koju plaćaju korisnici usluge.

Član 36.

(Mjere zaštite sistema odvodnje i prečišćavanja otpadnih voda)

Davalac usluge je dužan obezbijediti odgovarajuće mjere zaštite na objektima i uređajima sistema javne odvodnje i prečišćavanja otpadnih voda u cilju njihove ispravnosti i funkcionalnosti i obezbjeđenja propisnog kvaliteta otpadne vode koja se ispušta u recipijent, u skladu sa odgovarajućim zakonskim i tehničkim propisima i standardima.

VI PRIKLJUČENJE GRAĐEVINA KORISNIKA USLUGE NA OBJEKTE I UREĐAJE SISTEMA JAVNE ODVODNJE I PREČIŠĆAVANJA OTPADNIH VODA

Član 37.

(Obaveza priključenja građevina na objekte i uređaje sistema javne odvodnje i prečišćavanja otpadnih voda)

- (1) Svaka građevina za čiju izgradnju vlasnik građevine posjeduje odobrenje za građenje i koja je priključena na sistem snabdijevanja pitkom vodom, a nalazi se u ulici u kojoj je izgrađena kanalizaciona mreža sistema javne odvodnje i prečišćavanja otpadnih voda, mora se priključiti na tu mrežu.
- (2) Izuzetno od odredaba stava (1) ovog člana, na kanalizacionu mrežu sistema javne odvodnje i prečišćavanja otpadnih voda može se priključiti i građevina koja nije izgrađena na osnovu odobrenja za građenje, ali za koju vlasnik građevine posjeduje odgovarajuće uvjerenje općinskog organa uprave nadležnog za poslove građenja da za takvu građevinu odobrenje za građenje nije potrebno.

Član 38.

(Građevine koje se ne mogu priključiti na objekte i uređaje sistema javne odvodnje i prečišćavanja otpadnih voda)

Građevine kod kojih unutarjni sistem odvodnje otpadnih voda nije izgrađen u skladu sa propisima koji regulišu oblast odvodnje i prečišćavanja otpadnih voda, odnosno sa propisima koji regulišu izgradnju građevina, ne mogu se priključiti na javni sistem odvodnje i prečišćavanja otpadnih voda, na sistem lokalne odvodnje otpadnih voda i na sabirnu/septičku jamu.

Član 39.

(Priključenje kućnih kanalizacionih instalacija i uređaja na kanalizacionu mrežu)

- (1) Priključak kućnih kanalizacionih instalacija i uređaja na kanalizacionu mrežu vrši davalac usluge na pismeni zahtjev vlasnika ili korisnika građevine samo za objekte koji posjeduju odobrenje za građenje.
- (2) Davalac usluge je dužan izvršiti priključak ako su ispunjeni svi uslovi u pogledu izvedbe instalacija.
- (3) Iznimno objekti koji posjeduju odobrenje za građenje, a koji se ne mogu priključiti na javnu kanalizaciju (nema ulične kanalizacije, tehnički je nemoguće izvesti kanalski priključak i slično), moraju biti priključeni na propisno izgrađenu septičku jamu, prema zakonskim propisima.
- (4) Davalac usluge je dužan izvršiti dovođenje u prvobitno stanje javnih površina po odredbama Odluke o komunalnom redu.

Član 40.

(Zabrana samovoljnog priključivanja na kanalizacionu mrežu)

- (1) Zabranjeno je samovoljno priključivanje na kanalizacionu mrežu.
- (2) Ako se takav priključak izvede, davalac usluge će prijaviti istog nadležnoj službi organa uprave za vođenje prekršajnog postupka, te istog isključiti sa sistema odvodnje i prečišćavanja otpadnih voda.

Član 41.

(Kvar ili štetu na kanalizacionom priključku)

Svaki kvar ili štetu na kanalizacionom priključku, potrošač je dužan odmah prijaviti davaocu usluge, koji je dužan hitno poduzeti sve potrebne mjere radi otklanjanja kvara.

Član 42.

(Oštećenja i smetnje na kanalizacionom priključku)

- (1) Oštećenja i smetnje na kanalizacionom priključku nastala krivicom ili nepažnjom potrošača, davaoc usluge sanira o trošku potrošača.
- (2) U spornim slučajevima iz stava (1) ovog člana o plaćanju troškova, nadležan je Općinski sud u Travniku.

VII USLOVI I NAČIN PRUŽANJA ODNOSNO KORIŠTENJA USLUGE ODVODNJE I PREČIŠĆAVANJA OTPADNIH VODA KORISNIKU USLUGE

Član 43.

(Obaveznost korištenja usluge odvodnje i prečišćavanja otpadnih voda)

Korištenje komunalne usluge odvodnje i prečišćavanja otpadnih voda obavezno je za sva fizička i pravna lica vlasnika građevina na području općine, u skladu sa odredbama člana 1. Zakona o komunalnim djelatnostima SBK/KSB.

Član 44.

(Poseban priključak na kanalizacionu mrežu sistema javne odvodnje i prečišćavanja otpadnih voda)

- (1) Svaka građevina koja se priključuje na kanalizacionu mrežu sistema javne odvodnje i prečišćavanja otpadnih voda mora imati poseban priključak, uključujući i kontrolno okno.
- (2) Izuzetno od odredaba od stava 1 ovog člana, kada za to postoje opravdani tehnički razlozi, davalac usluge može putem jednog priključka priključiti više građevina na kanalizacionu mrežu sistema javne odvodnje i prečišćavanja otpadnih voda.

Član 45.

(Ispravnost unutarnjeg sistema odvodnje otpadnih voda)

Instalacije i uređaji unutarnjeg sistema odvodnje otpadnih voda građevine koja se priključuje na kanalizacionu mrežu sistema javne odvodnje i prečišćavanja otpadnih voda moraju biti izgrađeni u skladu sa važećim tehničkim propisima, standardima i normativima.

Član 46.

(Obaveza održavanja unutarnjeg sistema odvodnje otpadnih voda)

Korisnik usluge, vlasnik građevine koja je priključena na kanalizacionu mrežu sistema javne odvodnje i prečišćavanja otpadnih voda, dužan je instalacije i uređaje unutarnjeg sistema odvodnje otpadnih voda održavati u ispravnom i funkcionalnom stanju, koje obezbjeđuje redovnu i nesmetanu odvodnju unutarnjih otpadnih voda u sistem javne odvodnje i prečišćavanja otpadnih voda.

Član 47.

(Naknada za korištenje usluge odvodnje i prečišćavanja otpadnih voda)

- (1) Za korištenje usluge odvodnje i prečišćavanja otpadnih voda putem objekata i uređaja sistema javne odvodnje i prečišćavanja otpadnih voda korisnik plaća naknadu davaocu usluge.
- (2) Količina otpadne vode koja se upušta u sistem javne odvodnje i prečišćavanja otpadnih voda utvrđuje se na osnovu potrošnje pitke vode, čija se količina utvrđuje mjernim uređajem za isporučenu pitku vodu.

Član 48.

(Pravilnik o pružanju odnosno korištenju usluge odvodnje i prečišćavanja otpadnih voda)

- (1) Davalac usluge će donijeti pravilnik o uslovima i načinu pružanja, odnosno korištenja usluge odvodnje i prečišćavanja otpadnih voda putem sistema javne odvodnje i prečišćavanja otpadnih voda.
- (2) Saglasnost na pravilnik iz stava (1) ovog člana daje općinsko vijeće.

VIII MEĐUSOBNI ODNOSI DAVAOCA I KORISNIKA USLUGE ODVODNJE I PREČIŠĆAVANJA OTPADNIH VODA

Član 49.

(Ugovor o pružanju odnosno korištenju komunalne usluge)

Davalac i korisnik usluge odvodnje i prečišćavanja otpadnih voda dužni su zaključiti ugovor o pružanju odnosno korištenju komunalne usluge odvodnje i prečišćavanja otpadnih voda, kojim se regulišu prava, obaveze i odgovornosti davaoca i korisnika usluge.

Član 50.

(Sadržaj ugovora)

Ugovorom iz člana 49. ove Odluke reguliše se naročito:

- a) identifikacioni podaci o davaocu i korisniku usluge,
- b) predmet ugovora,
- c) način pružanja usluge od strane davaoca usluge,
- d) način obračuna, fakturisanja i plaćanja naknade za pruženu uslugu,
- e) obaveze davaoca usluge,
- f) obaveze korisnika usluge,
- g) razlozi za uskraćivanje usluge,
- h) razlozi za otkazivanje usluge,
- i) primjena zakonskih i pod zakonskih propisa u pružanju i korištenju usluge,
- j) nadzor u provođenju odredaba ugovora,
- k) način rješavanja sporova.

Član 51.

(Obaveze davaoca usluge)

Obaveze davaoca usluge u pružanju komunalne usluge odvodnje i prečišćavanja otpadnih voda korisniku usluge su naročito:

- a) obezbjeđenje usluge odvodnje i prečišćavanja otpadnih voda, bez prekida i u skladu sa važećim propisima,
- b) redovno i kvalitetno održavanje sistema odvodnje i prečišćavanja otpadnih voda od kontrolnog okna korisnika usluge do upuštanja otpadnih voda u recipijent,
- c) u najkraćem roku obavijestiti korisnika usluge o prekidu pružanja usluge, osim u slučajevima kada se prekid pružanja usluge nije mogao predvidjeti ili odmah otkloniti,
- d) očitavanje mjernih uređaja za isporučenu pitku vodu, koja je osnov za obračun naknade za pruženu uslugu odvodnje i prečišćavanja otpadnih voda, u prisustvu korisnika usluge,
- e) po potrebi, hitno otklanjanje kvarova na unutarnjem sistemu odvodnje otpadnih voda korisnika usluge, o trošku korisnika usluge,

- f) hitno postupanje po reklamaciji korisnika usluge,
- g) obavještanje korisnika usluge o poduzetim mjerama po reklamaciji korisnika usluge u roku od 24 sata po izvršenoj provjeri, odnosno uklanjanju razloga reklamacije,
- h) upoznavanje korisnika usluge o načinu obračuna, fakturisanja i plaćanja naknade za pruženu uslugu odvodnje i prečišćavanja otpadnih voda.

Član 52.

(Obaveze korisnika usluge)

Obaveze korisnika usluge u korištenju komunalne usluge odvodnje i prečišćavanja otpadnih voda su naročito:

- a) održavanje instalacija i uređaja unutarnjeg sistema odvodnje i prečišćavanja otpadnih voda u ispravnom stanju,
- b) omogućavanje predstavniku davaoca usluge pregled instalacija i uređaja unutarnjeg sistema odvodnje i prečišćavanja otpadnih voda u svakom trenutku, uz prethodnu obavijest od strane davaoca usluge,
- c) blagovremeno obavijestiti davaoca usluge o eventualnoj promjeni u identifikacionim podacima,
- d) blagovremeno obavijestiti davaoca usluge o prekidu korištenja usluge zbog preseljenja, odnosno prestanka korištenja stambenog, poslovnog ili drugog prostora,
- e) plaćati naknadu za pruženu uslugu u roku od 15 dana od dana prijema računa,
- f) eventualno reklamirati iznos računa za pruženu uslugu u roku od 8 dana od dana prijema računa.

Član 53.

(Ostali elementi ugovora)

Ostali elementi ugovora iz člana 49. ove Odluke bliže se regulišu u skladu sa odredbama Zakona o komunalnim djelatnostima.

Član 54.

(Važnost ugovora)

- (1) Ugovor o pružanju odnosno korištenju komunalne usluge odvodnje i prečišćavanja otpadnih voda iz člana 49. ove Odluke zaključuje se na neodređeno vrijeme.
- (2) Smatra se da je ugovor zaključen i u slučaju kada ga korisnik nije potpisao, a davalac usluge kontinuirano i bez prekida vrši uslugu odvodnje i prečišćavanja otpadnih voda iz građevine korisnika usluge.
- (3) Korisnik usluge može otkazati ugovor o pružanju odnosno korištenju usluge samo u slučaju prestanka korištenja stambenog, poslovnog ili drugog prostora i prestanka korištenja komunalne usluge snabdijevanja pitkom vodom, uz otkazni rok od 30 dana.
- (4) Korisnik usluge ne može otkazati ugovor o pružanju odnosno korištenju usluge odvodnje i prečišćavanja otpadnih voda ukoliko koristi uslugu snabdijevanja pitkom vodom.

Član 55.

(Obaveza vlasnika sabirnih – septičkih jama)

Vlasnik, odnosno korisnik sabirne (septičke) jame na područjima općine na kojima ne postoji izgrađen sistem javne odvodnje i prečišćavanja otpadnih voda i izgrađen lokalni sistem odvodnje otpadnih voda dužan je također zaključiti ugovor sa davaocem usluge, u skladu sa odredbama člana 22. ove Odluke.

Član 56.

(Obaveza korisnika usluge lokalnih sistema odvodnje otpadnih voda)

Ugovor sa davaocem usluge dužan je zaključiti i korisnik usluge odvodnje otpadnih voda lokalnim sistemom odvodnje otpadnih voda na područjima općine na kojima ne postoji sistem javne odvodnje i prečišćavanja otpadnih voda, ako je lokalni sistem predat na upravljanje i održavanje davaocu usluge.

IX USKRAĆIVANJE KOMUNALNE USLUGE ODVODNJE I PREČIŠĆAVANJA OTPADNIH VODA

Član 57.

(Razlozi za uskraćivanje usluge odvodnje i prečišćavanja otpadnih voda)

- (1) Davalac usluge odvodnje i prečišćavanja otpadnih voda može korisniku usluge uskratiti, odnosno obustaviti pružanje usluge u slijedećim slučajevima:
 - a) ako korisnik usluge izvrši priključenje na sistem javne odvodnje i prečišćavanja otpadnih voda bez prethodno pribavljenog odobrenja nadležnog općinskog organa uprave, odnosno davaoca usluge,
 - b) ako korisnik usluge uslugu koristi protivno propisima, odnosno odredbama ugovora o pružanju odnosno korištenju usluge odvodnje i prečišćavanja otpadnih voda,
 - c) ako korisnik usluge ne plati naknadu za korištenje usluge odvodnje i prečišćavanja otpadnih voda tri mjeseca uzastopno ili odbije da primi račun za pruženu uslugu ili vrati račun davaocu usluge bez obrazloženog i opravdanog razloga,
 - d) ako korisnik usluge, bez saglasnosti davaoca usluge, vrši radove na priključku odnosno kanalizacionoj mreži izvan kontrolnog okna,
 - e) ako korisnik usluge onemogućiti predstavniku davaoca usluge pregled instalacija i uređaja unutarnjeg sistema odvodnje i prečišćavanja otpadnih voda,
 - f) ako se korisnik usluge, koji je bio isključen sa sistema javne odvodnje i prečišćavanja otpadnih voda, sam ponovo priključi, bez znanja odnosno saglasnosti davaoca usluge.
- (2) U slučaju iz stava (1) ovog člana korisnik usluge isključit će se i sa javnog sistema snabdijevanja pitkom vodom.
- (3) Davalac usluge može uskratiti, odnosno obustaviti pružanje usluge odvodnje i prečišćavanja otpadnih voda u slučajevima iz stava (1) ovog člana samo pod uslovom da to dozvoljavaju tehničke mogućnosti i da se time ne ugrožavaju drugi korisnici usluge odvodnje i prečišćavanja otpadnih voda.
- (4) Po prestanku razloga za uskraćivanje, odnosno obustavljanje pružanja usluge odvodnje i prečišćavanja otpadnih voda, davalac usluge je dužan da, na zahtjev korisnika usluge, u roku od tri dana od dana podnošenja zahtjeva, omogući korisniku usluge ponovno korištenje usluge odvodnje i prečišćavanja otpadnih voda.
- (5) Troškovi ponovnog priključenja građevine korisnika usluge na kanalizacionu mrežu sistema javne odvodnje i prečišćavanja otpadnih voda snosi korisnik usluge.

X NAČIN UTVRĐIVANJA, OBRAČUNA I PLAĆANJA NAKNADE ZA PRUŽANJE USLUGE ODVODNJE I PREČIŠĆAVANJA OTPADNIH VODA

Član 58.

(Utvrđivanje naknade za pruženu uslugu odvodnje i prečišćavanja otpadnih voda)

- (1) Visinu naknade za pruženu uslugu odvodnje i prečišćavanja otpadnih voda utvrđuje davalac usluge.
- (2) Visina naknade za pruženu uslugu odvodnje i prečišćavanja otpadnih voda koju utvrdi davalac usluge ne može se primjenjivati bez prethodne saglasnosti općinskog vijeća.

Član 59.

(Jedinica mjere za pruženu uslugu odvodnje i prečišćavanja otpadnih voda)

- (1) Količina otpadne vode upuštene u kanalizacionu mrežu sistema javne odvodnje i prečišćavanja otpadnih voda izražava se u kubnim metrima, a utvrđuje se na osnovu utrošene, odnosno isporučene pitke vode korisniku usluge iz javnog sistema snabdijevanja pitkom vodom, očitanoj na mjernom uređaju korisnika usluge.
- (2) Ukoliko korisnik usluge u procesu proizvodnje koristi i vodu iz izvora izvan javnog sistema snabdijevanja pitkom vodom, količina te otpadne vode utvrđuje se posebnim mjernim uređajem, postavljenom na priključku sa javnim sistemom odvodnje otpadnih voda.

Član 60.

(Utvrđivanje količina ispuštene otpadne vode u stambenim objektima sa više stambenih jedinica i drugim objektima sa više funkcionalnih cjelina)

Količina otpadne vode upuštene u kanalizacionu mrežu sistema javne odvodnje otpadnih voda za korisnike usluge u objektima kolektivnog stanovanja sa više stambenih jedinica i drugim objektima sa više funkcionalnih cjelina utvrđuje se na osnovu utroška pitke vode iz javnog sistema snabdijevanja pitkom vodom tih korisnika usluge.

Član 61.

(Fakturisanje i plaćanje usluge odvodnje i prečišćavanja otpadnih voda)

- (1) Račun za pruženu uslugu odvodnje i prečišćavanja otpadnih voda davalac usluge ispostavlja korisniku usluge jedanput mjesečno za protekli mjesec.
- (2) Rok za plaćanje računa je 15 dana od dana prijema istog i mora biti naznačen na svakom ispostavljenom računu.
- (3) Račun za pruženu uslugu sadrži obavezno podatke o davaocu usluge, podatke o korisniku usluge, broj članova domaćinstva stambene jedinice, broj korisnika druge jedinice, način obračuna naknade i visinu naknade po obračunskoj jedinici.
- (4) Na iznos ispostavljenog računa i obračun naknade za pruženu uslugu korisnik usluge ima pravo prigovora u roku od osam dana od dana dostave računa, u protivnom se smatra da su obračun i iznos naknade ispravni.
- (5) Davalac usluge je dužan na prigovor korisnika usluge odgovoriti u roku od osam dana od dana dostave prigovora.
- (6) Ako je davalac usluge uvažio prigovor, dužan je korisniku usluge ispostaviti novi ispravan račun i izvršiti usklađivanje obračuna u svojim poslovnim knjigama.

Član 62.

(Izmjena visine naknade za pruženu uslugu)

U slučaju izmjene visine naknade za pruženu uslugu odvodnje i prečišćavanja otpadnih voda, davalac usluge je dužan blagovremeno obavijestiti korisnike usluge putem pojedinačnih obavijesti priloženih uz račune sa novim iznosima naknade.

Član 63.

(Vlasnici sabirnih – septičkih jama i korisnici usluge lokalnih sistema odvodnje otpadnih voda)

Odredbе ove Odluke o utvrđivanju, obračunu i plaćanju naknade za odvodnju i prečišćavanje otpadnih voda analogno se primjenjuju na korisnike usluge vlasnike sabirnih (septičkih) jama i korisnike usluge odvodnje otpadnih voda putem lokalnih sistema odvodnje otpadnih voda na područjima općine na kojima ne postoji izgrađen sistem javne odvodnje i prečišćavanja otpadnih voda.

XI NAČIN POSTUPANJA I OVLAŠTENJA OPĆINE U OBAVLJANJU DJELATNOSTI ODVODNJE I PREČIŠĆAVANJA OTPADNIH VODA

Član 64.

(Obezbjedenje uslova za obavljanje djelatnosti)

Općina obezbjeđuje uslove za obavljanje komunalne djelatnosti odvodnje i prečišćavanja otpadnih voda na cijelom području općine, po načelima održivog razvoja.

Član 65.

(Praćenje stanja u djelatnosti)

- (1) Putem svoga organa uprave nadležnog za komunalne poslove, Općina kontinuirano prati stanje u obavljanju komunalne djelatnosti odvodnje i prečišćavanja otpadnih voda na području općine.

- (2) U praćenju stanja u obavljanju komunalne djelatnosti odvodnje i prečišćavanja otpadnih voda, općinski organ uprave nadležan za komunalne poslove prvenstveno prati davaoca usluge odvodnje i prečišćavanja otpadnih voda u izvršavanju zakona i drugih propisa u obavljanju djelatnosti i načinu i kvalitetu pružanja usluge korisnicima usluge.
- (3) Kada općinski organ uprave nadležan za komunalne poslove utvrdi, odnosno ocijeni da se u djelatnosti odvodnje i prečišćavanja otpadnih voda ne izvršavaju zakonski i drugi propisi od strane davaoca usluge, dužan je odmah poduzeti konkretne mjere za koje je ovlašten, odnosno općinskom načelniku i općinskom vijeću predložiti poduzimanje odgovarajućih hitnih mjera iz njihove nadležnosti za rješavanje prisutnih problema u obavljanju komunalne djelatnosti odvodnje i prečišćavanja otpadnih voda, u skladu sa zakonom.

Član 66.

(Poduzimanje mjera od strane nadležnog općinskog organa uprave)

U slučaju nastupanja neočekivanih poremećaja ili prekida u obavljanju komunalne djelatnosti odvodnje i prečišćavanja otpadnih voda, odnosno u pružanju usluge korisnicima usluge, općinski organ uprave nadležan za komunalne poslove je dužan, čim primi obavijest, odnosno utvrdi da je došlo do poremećaja odnosno prekida u obavljanju djelatnosti, da bez odlaganja poduzme slijedeće mjere i aktivnosti:

- a) utvrdi da li je davalac usluge poduzeo sve potrebne i adekvatne mjere, koje bi omogućile nastavak obavljanja djelatnosti odvodnje i prečišćavanja otpadnih voda i redovno pružanje usluge korisnicima usluge,
- b) preko davaoca usluge, a po potrebi i drugih lica, poduzme mjere za otklanjanje nastalih posljedica, kao i druge mjere za nesmetano obavljanje djelatnosti odvodnje i prečišćavanja otpadnih voda i kontinuirano pružanje usluge korisnicima usluge,
- c) naredi davaocu usluge da poduzme hitne mjere za zaštitu objekata i uređaja sistema javne odvodnje i prečišćavanja otpadnih voda, kao i druge imovine koja je ugrožena,
- d) utvrdi razloge i eventualnu odgovornost za poremećaj, odnosno prekid u obavljanju djelatnosti i nastalu štetu, te poduzme odgovarajuće mjere protiv odgovornih lica, uključujući i naknadu štete.

XII NADZOR

Član 67.

(Upravni nadzor)

Upravni nadzor nad provođenjem odredaba ove Odluke vrši općinski organ uprave nadležan za komunalne poslove.

Član 68.

(Inspeksijski nadzor)

Inspeksijski nadzor nad provođenjem odredaba ove Odluke vrši općinski okolišno-vodni inspektor, u skladu sa odredbama Zakona o vodama SBK/KSB („Službene novine SBK/KSB“, broj: 11/09) i komunalni inspektor, u skladu sa odredbama Zakona o komunalnim djelatnostima („Službene novine SBK/KSB“, broj: 13/13).

XIII KAZNE NE ODREDBE

Član 69.

(Prekršaji)

- (1) Novčanom kaznom od 1.000,00 KM do 5.000,00 KM kaznit će se za prekršaj davalac usluge:
 - a) ako u sistem javne odvodnje otpadnih voda otpadne vode ispuštaju suprotno odredbama člana 8. ove Odluke,
 - b) ako u sistem javne odvodnje i prečišćavanja otpadnih voda dozvoli ispuštanje otpadnih voda iz člana 10. ove Odluke,
 - c) ako se ne pridržava obaveza utvrđenih u članu 11. ove Odluke,

- d) ako u sistem javne odvodnje i prečišćavanja otpadnih voda dozvoli ispuštanje tvari iz člana 12. ove Odluke
- e) ako ne postupa u skladu sa odredbama člana 13. ove Odluke,
- f) ako u slučaju planiranog prekida u obavljanju djelatnosti ne postupi u skladu sa odredbama iz člana 14. ove Odluke,
- g) ako u slučaju neplaniranog prekida u obavljanju djelatnosti ne postupi u skladu sa odredbama iz člana 15. ove Odluke,
- h) ako se u obavljanju djelatnosti ne pridržava propisa iz člana 17. ove Odluke,
- i) ako pražnjenje i čišćenje sabirnih (septičkih) jama ne vrši u skladu sa odredbama člana 22. ove Odluke,
- j) ako ne vodi evidenciju vlasnika sabirnih (septičkih) jama i evidenciju pražnjenja istih u skladu sa odredbama člana 24. stav (1) ove Odluke,
- k) ako ne izradi program pražnjenja sabirnih (septičkih) jama u skladu sa odredbama člana 24. stav (2) ove Odluke,
- l) ako ne postupa u skladu sa obavezama iz odredbi člana 24. stav (3) i stav (4) ove Odluke,
- m) ako se u upravljanju i korištenju objekata i uređaja sistema javne odvodnje i prečišćavanja otpadnih voda ne pridržava propisa iz člana 33. ove Odluke,
- n) ako sistem javne odvodnje i prečišćavanja otpadnih voda ne održava u ispravnom i funkcionalnom stanju (član 34),
- o) ako ne obezbijedi odgovarajuće mjere zaštite na objektima i uređajima sistema javne odvodnje i prečišćavanja otpadnih voda (član 36. Odluke),
- p) ako odbije da priključi na sistem javne odvodnje i prečišćavanja otpadnih voda građevinu koja ispunjava uslove iz člana 37. ove Odluke,
- q) ako postupa suprotno odredbama člana 40. ove Odluke,
- r) ako priključi na kanalizacijsku mrežu građevinu suprotno odredbama člana 43. ove Odluke,
- s) ako instalacije i uređaji unutarnjeg sistema odvodnje otpadnih voda građevine su izgrađeni suprotno odredbama člana 44. ove Odluke,
- t) ako se ne pridržava obaveza utvrđenih u članu 50. ove Odluke,
- u) ako u slučaju uskraćivanja usluge korisniku usluge ne postupi u skladu sa odredbama člana 56. ove Odluke,
- v) ako kod ispostavljanja računa za pruženu uslugu korisniku usluge ne postupi u skladu sa odredbama člana 61. ove Odluke,
- w) ako u slučaju izmjene visine naknade za pruženu uslugu blagovremeno ne obavijesti korisnika usluge o toj izmjeni (član 62. Odluke),

(2) Za prekršaj iz stava (1) ovog člana kaznit će se i odgovorno lice davaoca usluge novčanom kaznom od 300,00 KM do 1000,00 KM.

Član 70.

(Prekršaji)

(1) Novčanom kaznom od 1.000,00 KM do 5.000,00 KM kaznit će se za prekršaj pravno lice kao korisnik usluge:

- a) ako u sistem javne odvodnje otpadnih voda otpadne vode ispuštaju suprotno odredbama člana 8. ove Odluke,
- b) ako se ne pridržava obaveza utvrđenih u članu 9. ove Odluke,
- c) ako se ne pridržava obaveza utvrđenih u članu 10. ove Odluke,
- d) ako u sistem javne odvodnje i prečišćavanja otpadnih voda ispušta tvari iz člana 12. stav (1) ove Odluke,
- e) ako ne postupi u skladu sa obavezom utvrđenom članom 12. stav (2) ove Odluke,
- f) ako sabirnu (septičku) jamu gradi suprotno odredbama člana 19. stav (1) i stav (2) ove Odluke
- g) ako sabirnu (septičku) jamu gradi bez vodnog akta iz člana 20. ove Odluke
- h) ako u sabirnu (septičku) jamu upušta otpadne vode suprotno odredbama člana 21. ove Odluke,
- i) ako nakon izgradnje sistema javne odvodnje i prečišćavanja otpadnih voda ne postupi u skladu sa odredbama člana 23. ove Odluke,
- j) ako se postupa suprotno odredbama člana 26. ove Odluke,
- k) ako se ne postupa u skladu sa odredbama člana 32. ove Odluke,
- l) ako se samovoljno priključi na kanalizacionu mrežu (član 40. stav (1) Odluke),

- m) ako unutarnji sistem odvodnje otpadnih voda ne održava u skladu sa odredbama člana 45. ove Odluke,
 - n) ako kao vlasnik odnosno korisnik sabirne (septičke) jame ne zaključi ugovor sa davaocem usluge (član 55.),
 - o) ako kao korisnik usluge lokalnog sistema odvodnje otpadnih voda ne zaključi ugovor sa davaocem usluge (član 56.),
- (2) Za prekršaj iz stava (1) ovog člana kaznit će se i odgovorno lice pravnog lica korisnika usluge novčanom kaznom od 300,00 KM do 1.000,00 KM.
- (3) Za prekršaj iz stava (1) ovog člana kaznit će se i fizičko lice kao korisnik usluge novčanom kaznom od 200,00 KM do 500,00 KM.

Član 71.

(Prekršaji)

- (1) Novčanom kaznom od 1.000,00 KM do 5.000,00 KM kaznit će se za prekršaj pravno lice vlasnik lokalnog sistema odvodnje otpadnih voda ako, do predaje lokalnog sistema na upravljanje i održavanje davaocu usluge, isti ne održava u skladu sa odredbama člana 25. ove Odluke.
- (2) Za prekršaj iz stava (1) ovog člana kaznit će se i odgovorno lice pravnog lica vlasnika lokalnog sistema odvodnje otpadnih voda novčanom kaznom od 300,00 KM do 1.000,00 KM.
- (3) Za prekršaj iz stava (1) ovog člana kaznit će se i fizičko lice vlasnik lokalnog sistema odvodnje otpadnih voda novčanom kaznom od 200,00 KM do 500,00 KM.
- (4) Za postupanje suprotno odredbama člana 26. kaznit će se pravno i fizičko lice novčanom kaznom od 200,00 KM do 500,00 KM.

Član 72.

(Prekršaji)

- (1) Novčanom kaznom od 1.000,00 KM do 5.000,00 KM kaznit će se za prekršaj pravno lice davatelj usluge, te upravitelj zgrade i pravno lice korisnik usluge:
 - a) ako se ne pridržava odredbi utvrđenih članom 22. stav (7) ove Odluke,
 - b) ako se ne pridržava odredbi utvrđenih članom 38. ove Odluke
 - c) ako se ne pridržava odredbi utvrđenih članom 39. ove Odluke.
- (2) Za prekršaj iz stava (1) ovog člana kaznit će se i odgovorno lice davatelja usluge, upravitelja zgrade i pravneog lica korisnika usluge, novčanom kaznom od 200,00 KM do 1.000,00 KM.
- (3) Za prekršaj iz stava (1) ovog člana kaznit će se i fizičko lice korisnik usluge, novčanom kaznom od 300,00 KM do 1.500,00 KM.

XIV PRELAZNE I ZAVRŠNE ODREDBE

Član 73.

(Rok za donošenje pravilnika o pružanju usluge)

Pravilnik o uslovima i načinu pružanja, odnosno korištenja usluge odvodnje i prečišćavanja otpadnih voda iz člana 48. ove Odluke, davalac usluge će donijeti u roku od šest mjeseci od dana stupanja na snagu ove Odluke.

Član 74.

(Rok za uspostavljanje evidencije sabirnih – septičkih jama)

U roku od jedne godine od dana stupanja na snagu ove Odluke, davalac usluge će uspostaviti evidenciju vlasnika odnosno korisnika sabirnih (septičkih) jama i evidenciju pražnjenja istih, a u skladu sa odredbama člana 24. stav (1) ove Odluke.

Član 75.

(Rok za donošenje programa pražnjenja i čišćenja sabirnih-septičkih jama)

U roku od jedne godine od dana stupanja na snagu ove Odluke, davalac usluge će izraditi Program pražnjenja i čišćenja sabirnih (septičkih) jama iz člana 24, stav (2) ove Odluke.

Član 76.

Ova Odluka stupa na snagu osmog dana od dana objavljivanja u „Službenim novinama Općine Travnik“.

Broj: 01-_____/19
Datum;_____2019.godine
T R A V N I K

**PREDSJEDAVAJUĆA
OPĆINSKOG VIJEĆA**

Vlatka Lovrinović, dipl.teol.